

ጳውሎስ ሂሞቲዮሳስ ፃፊዳ ናሞዓንሉ ኪታ ጋሳ ቆፋ

ጳውሎስ ሂሞቲዮሳስ ፃፊዳ ናሞዓንሉ ኪታይ፡ ጳውሎሳራ ኢሲፌ ኦፊሴሳኔ ጳውሎሳ ማታን ማዲያ ናዓቲላ ሂሞቲዮሳ ዘሪዳ ዘሪያ ኦይኪስ፡ ሄ ዘሪያ ኦይፌ ቆፋይ፡ «ጌንጫን ሚናናው ቤሱስ» ጌይሳ፡ ሂሞቲዮሱ ዘሬኔ ሚንጮሶ ቃላ ኤኪዳይ፡ ዬሱስ ኪሪስቶሳባ ቱማ ማርካታና ሜላ ዋንጌላ ቃላኔ ጋለዓ ጫቆ ቲሚርቲያ ሚንሱዲ ኦይካና ሜላኔ ሜቶይኔ ኢያይ ዳሪኮካ ታማርሶኒኔ ዋንጌላ ሳባኩን ሚናና ሜላሳ፡፡

ሂሞቲዮሱ ሃዳ ኤያቲላ ፓላማፔ ሃካና ሜላ ዲማ ሚኖ ዘሪይ ኢያው ኢሜቲስ፡ ሄሳ ሜላ ኦዲይ ኣሳ ቆይሱሲፔ ኣቲን ኣይኮካ ማዳና፡፡

ሄ ኡባን ሂሞቲዮሱ ኣኬካናው ቤሲያባይ፡ ጳውሎሳ ሃናታኔ ኢያ ዲሳ ቆፋ ሄሲካ፡ ኢያ ኣማኑዋ፡ ኢያ ጌንጫ፡ ኢያ ሰቁዋ፡ ኢያ ደንዳዓኔ ኢያ ጋኪዳ ሜቱዋ ለሚሶ ኦሱዲ ካላናይሳ፡፡ ጳውሎስ ሃ ኪታ ፃፊዳይ፡ ኢ ባ ዋላ ኦንጊዲ ሃይቆስ ጊጌቲዳ ዋዳና፡፡

2 ሂሞቲዮሳ ኪታ ኣይፌ ቆፋታ

- ጌሎ ቆፋ 1:1-2
- ሂሞቲዮሳስ ኢሜቲዳ ዘሪያ 1:3-2:13
- ወርሴላ ዋዲያባ 2:14-4:5
- ጳውሎስ ሃኒዲ ዳዒያ ዲሳ 4:6-18
- ኩሻ ቆፋ 4:19-22

1 ያሳ ሸኔን፡ ዬሱስ ኪሪስቶሳን ቤንቲዳ ዳዖ ኡፋይሳ ማርካታናው ዬሱስ ኪሪስቶሳ ሃዋሬ ጊዲዳ ጳውሎሳፔ፡ 2 ታ ደሲያ ናዓ ሂሞቲዮሳስ ኪቲቲዳ ኪታ፡፡

ያሳ ኣዋፔኔ ኑ ጎዳ ኪሪስቶስ ዬሱሳፔ ኣጼ ኬሃቲላይ፡ ማርቲላይኔ ሳርቲላይ ኔው ጊደ፡፡

ሂሞቲዮሳስ ኢሜቲዳ ዘሪያ

3 ታኒ፡ ታ ዋሳን ቃማኔ ጋለስ ኔና ቆፓይስ፡ ታኒ ዋሲያ ዋዴ ታ ማይዛታ ያሳኔ ታኒ ሎዖ ካሃን ሃጋዚያ ያሳ ኔ ጊሾ ጋላታይስ፡፡
4 ታኒ ኔ ኣፋላ ቆፓይስ፤ ኔና ቤዓዳ ኡፋይታናው ዳር ላሞታይስ፡፡

1:2 ሃ.ኦ 16:1

5 ቃሲ ኔው ዳዒያ ቱማ አማኑዋ ኤራይሰ። ሄ አማኖይ ቤኒ ኔ ዋጋ አዬ ሎይዲኒኔ ኔ አዬ ኤወኒቂን ዳዒያ አማኑዋ ማለ።
 6 ሄሳ ጊሾ፣ ታኒ ታ ኩሺያ ኔ ቦላ ዋሊዳ ዋዴ ያሳይ ኔው ኢሚዳ ኢሞታ ኔኒ ዛራ ኤላና ማላ አኬኪሳይሰ። 7 አይሰ ጊኮ፣ ያሳይ ኑሰ ዋልቃ፣ ሲቆኔ ኑ ሁዔ ሃሪያ አያና ኢሚሰፔ አቲን ያሻ አያና ኢሚቤና።

8 ሂዛ፣ ኑ ጎዳሰ ማርካታናው ዬላቶፓ፤ ቃሲ ኢያ ጊሾ ቃሽቲዳ ታናንካ ዬላቶፓ። ሺን ያሳይ ኔው ኢሚያ ዋልቃን ዋንጌላ ጊሾ ታራ ሜቶ ኤካ። 9 ያሳይ ባ ሸኔኒኔ ባ አቶ ኬሃቴላን ኑና አሺዲ፣ ባ ጌሻ ዴሬ ኦላናው ኑና ዶሪሰፔ አቲን ኑኒ አሊዳ አሱዋ ጊሾ ጊዴና። ሃ አቶ ኬሃቴላ ኪሪሰቶሰ ዬሱሳ ባጋራ አላሜይ ሜዴታናፔ ሲገሌ ኑሰ ኢሚሰ። 10 ሃዒ ሃ አቶ ኬሃቴላይ ኑና አሺያ ኪሪሰቶሰ ዬሱሳ ዩሳን ቆንጨሰ። ኢ ሃይቆ ዋልቃ ጳይሲዲ፣ ዋንጌላ ባጋራ ጳዮና ዴዖ ኑሰ ቆንጨሲሰ።

11 ታኒ ዋንጌላ ሳባኬ፣ ሃዋሬኔ አሰታማሬ ጊዳና ማላ ያሳይ ታና ዶሪሰ። 12 ታኒ ሄሳ ጊሾ ሃ ሜቱዋ ኤካይሰ፤ ሺን ታ አማኔይ ኦኔኮ ኤሪያ ጊሾ ዬላቲኬ። ታው ኢሜቲዳ ሃዳራ ሄ ጋላሳይ ጋካናው ኢ ናጋናው ዳንዳዔይሳ ኤራይሰ።

13 ታኒ ኔና ታማርሲዳ ቱማ ቃላ ለሚሶ ኦላ ኦይካዳ ኪሪሰቶሰ ዬሱሳ ባጋራ ኑባ ጊዲዳ አማኑዋኒኔ ሰቁዋን ዴዓ። 14 ኑ ጊዴን ዳዒያ ጌሻ አያና ዋልቃን ኔው ኢሜቲዳ ሎዖ ሃዳራ ናጋ።

15 ኢሲያ ቢታን ዳዒያ ኡባይ ታፔ ሃኪዳይሳ ኤራሳ፤ ኤንታ ጊዴን ፊጌሉሲኔ ሄርሞጌኔሲ ዴዖሶና።

16 አኔሰፎሪ ታና ዳር ዋዴ ሚንሌሊዳ ጊሾ ጎዳይ ኢያ ሶ አሳሰ ቃዴቶ። ታኒ ቃሾ ኬላን ዳዒያ ዋዴ ኢ ታናን ዬላቲቤና።
 17 ሄሳ ቦላ ኢ ሮሜ ካታማ ዪዳ ዋዴ ታና ሚንሊ ኮዪዲ ዳሚሰ።
 18 ወርሴላ ጋላሳን ጎዳይ ኢያው ቃዴታና ማላ ታኒ ጎዳ ዋሳይሰ። ኤፌሶና ካታማን ኢ ታና አይ ማላ ማዲዳኮ ኑ ሎይላ ኤራሳ።

2

ዬሱሰ ኪሪሰቶሳን ሚና

1 ሂዛ፣ ታ ናናው፣ ኪሪሰቶሰ ዬሱሳን ዳዒያ ማርቲላን ሚና።
 2 ዳር ማርካታ ሲገላን ታኒ ኔና ታማርሲዳ ቲሚርቲያ፣ ሃራታ ታማርሳናው ዳንዳዒያ አማኔቲዳ አሳሰ ሃዳራ ኢማ።
 3 ዬሱሰ ኪሪሰቶሳሰ አማንሌያ ዋታዳሬ ጊዲዳ ታራ ሜቶ ኤካ። 4 ኦላ ዋታዳሬይ ባ ሃላቃ ኡፋይሳናው ጊጌቲሲፔ አቲን

ሃራ አሶን ባና ፔሽና። 5 ሄሳዳካ፣ ጋዴ ዋዒያ ኦኒካ ቤሲያ ኦጌራ ጋዴቶና ኢዲኮ ዋይቶ ኤኬና። 6 ጎሻን ዳቡሪያ ጎሻንቸይ ባ ዳቡራ ኣይፊያፔ ሚያ ኮይሮ ኣሲ ጊዳናው ቤሴሰ። 7 ኔ ኣኬካና ማላ ጎዳይ ኔና ማዳና ጊሾ ታ ኔው ኦዲዳባ ኔ ዋዛናን ና።

8 ታኒ ማርካቲያ ዋንጌላ ማላ ሃይቆፔ ዳንዲዳ፣ ዳዊቲ ዜሬሌ ጊዲዳ ዩሱስ ኪሪስቶሳ ቆፓ። 9 ታኒ ዋንጌላ ኦዲያ ጊሾ ኢታባ ኦሊዳ ኣሳዳ፣ ቃሼታዳ ሜቶ ኤካሰ። ሺን ያሳ ቃላይ ቃሼቲና። 10 ሄሳ ጊሾ፣ ያሳይ ዶሪዳ ኣሳቲ ኪሪስቶስ ዩሱሳን ዳዒያ ኣቶቴላ ማሪና ቦንቹዋራ ኤካና ማላ ኤንታ ጊሾ ኡባባን ዋይታይሰ።

11 ሃይሳዳ ያጊያ ቱማ ቃሊ ዳዔስ፤

«ኑኒ ኢያራ ሃይቂዳባ ጊዲኮ፣
ኢያራ ኢሲፌ ዳዓና።

12 ኑኒ ጌንጨኮ፣
ኢያራ ኢሲፌ ካዎታና።

ኑኒ ኢያ ካዲኮ፣
ኢ ኑና ካዳና።

13 ኑኒ ኣማኔቶና ኢዲኮ፣
ኢ ኣማኔቲዳይሳ ጊዲዲ ዳና።

ኣይሰ ጊኮ፣ ኢ ባና
ካዳናው ዳንዳዔና» ያጌሰ።

ሚኖ ኦሳንቸ

14 ኔኒ ኤንታ ሃይሳ ኣኬኪሳ፤ ኤንቲ ቃላታ ጋሶን ፓላዋና ማላ፣ ጎዳ ሲንፋን ኤንታ ዘራ። ሄሲ ሲዔይሳታ ቋይሴሲፔ ኣቲን ኣይኮካ ማዳና። 15 ኔኒ ቱማ ቃላ ሱሬቲላን ታማርሴይሳኔ ዩላዮና ኦሳንቸ ጊዲዳ፣ ያሳይ ናሺያ ኣሳዳ፣ ኔናቴላ ኢያው ኢማናው ሚና። 16 ሺን ሃ ኣላሚያስ ኢንጃቲያ ጎዖና ኦዳፔ ባቃታ። ሄሳ ማላ ኦዳይ ኣሴ ያሳፌ ሃሴሰ። 17 ሄሳ ማላ ኦዳይ ኣሳቴሌ ሚዲጊያ ፓዖና ዋይዛዚሬ ማዲንፋ ማላ። ሄሳ ማላ ኦዳ ኦዳቴይሳታ ጊዲፌ ሄሚኖሶሴ ፊሊዮሲ ዳዖሶና። 18 ሃ ኣሳቲ ቱማ ኦጊያ ኣጊዲ፣ «ሃይቂዳ ኣሳይ ሃይቆፔ ቤኒ ዳንዲዳሶና» ያጊዲ ጉላ ኣሳታ ኣማኑዋ ቋይሲዳሶና።

19 ጊደሺን፣ ያሳይ ሚኖ ዛላ ሃዒዳ ጊሾ ቃፃናው ዳንዳዔና። ኢያ ቦላ፣ «ጎዳይ ባይሳታ ኤሬሰ። ጎዳ ሱንፋ ዌጊያ ኦኒካ ኢታ ኦሶፔ ሃኮ» ያጊያ ቃላይ ዓፌቲሰ።

20 ኢሲ ጊታ ከላን ዋርቃፌ ዋይኮ ቢራፔ ኦሴቲዳ ሚሼታ ፃላላ ጊደናሺን ሚላፌ ዋይኮ ኡርቃፌ ኦሴቲዳ ሚሼቲካ ዳዖሶና። ሄሳታፔ ባጋቲ ቦንቾ ኦሶስ፣ ቃሲ ባጋቲ ቶሹቲያ ኦሶስ ፔዖሶና።

21 ሄሳ ጊሾ፣ ኦኒካ ኢታ ኡባ ኣጊኮኔ ባና ጌሺኮ፣ ቦንቾ ኦሶ ኦሊያ ሚሼ ጊዳና። ኤንታ ዴዖይ ጌሺኔ ጎዳ ኡፋይሲያባ፣ ቃሲ ኤንቲ ሎዖ ኦሶ ኡባ ኦላናው ዳንዳዔይሳታ ጊዳና።

22 ናዓቴላ ኢታ ኣሙዋፔ ባቃታ። ጌሻ ዋዛናን ጎዳ ያጊያ ኣሳታራ ኢሲፌ፣ ዲሎቴላ፣ ኣማኑዋ፣ ሲቆኔ ሳሮቴላ ካላ።

23 ሺን ኦሺ ሜዴይሳ ኤራዳ ኤያቴላኔ ሃዳ ጊዲዳ ፓላማፔ ሃካ። 24 ጎዳ ኦሳንቾይ ኣሳ ኡባሰ ኬሃ፣ ሎዖ ታማርሴይሳኔ ዳንዳዓንቾ ጊዳናው ቤሴሲፔ ኣቲን ኦይታናው ቤሴና። 25 ኢ ባራ ኤቄቲይሳታ ኣሽኩቴላን ሴሬይሳ ጊዳናው ቤሴሰ። ኤንቲ ባንታ ናጋራፔ ሰሚዲ ቱማ ኤራናዳ ያሳይ ኦላኔኮ ኦኒ ኤሬ። 26 ኤንቲ ባንታ ዋዛናኮ ሰሚዲ ባ ሺኒያ ኦላና ሜላ ኤንታ ኦይኪዳ ፃላሄ ዪሂያፔ ኬሲ ኤካና።

3

ወርሴላ ጋላሳ ማላታታ

1 ወርሴላ ጋላሳን ኡንዔሊያ ዋዳይ ያናይሳ ኤራ። 2 ኣሳይ ባንታና ዶሴይሳታ፣ ሚሼ ሲቄይሳታ፣ ጩቄቲይሳታ፣ ኦቶሬይሳታ፣ ጫዬይሳታ፣ ባንታና ዩሊዳይሳታሰ ከቲቶናይሰታ፣ ጋላቶናይሰታ፣ ጌሻቴላ ባይናይሳታ፣ 3 ሲቆይ ባይናይሳታ፣ ማሮቴላ ኤርናይሳታ፣ ዘጊሬይሳታ፣ ባንታና ሃሮናይሳታ፣ ቃዴይ ባይናይሳታ፣ ሎዖ ደሶናይሳታ፣ 4 ሞርኬስ ኣሊ ኢሜይሳታ፣ ቆሬ ባይናይሳታ፣ ኦቶሮን ሱጌቲይሳታ፣ ያሳፌ ኣሊዲ ኣሾ ኡፋይሳናው ደሴይሳታ ጊዳና። 5 ኤንቲ ኣማኒያ ዳናሶናፔ ኣቲን ኣማኖ ዋልቃ ካዶሶና፤ ኔኒ ሄሳ ሜላ ኣሳታፔ ባቃታ።

6 ኤንታፌ ኢሶቲ ኢሶቲ ኣሳ ከሌ ጌሊዲ ናጋራን ኦይከቲዳይሳታኔ ዲማ ዲማ ኣሞን ሱጌቲያ ዳቡራንቾ ማጫሳታ ቦላ ጎዳቶሶና። 7 ሄ ማጫሳቲ ኡባ ዋዳ ታማርሶና፣ ሺን ቱማ ኤራናው ዳንዳዖኮና። 8 ያኔሲኔ ያምባሬሲ ሙሴራ ኤቄቲዳይሳዳ ሃ ኣሳቲ ጉጌይ ኦላናይሳታኔ ኣማኖን ኩንዲዳ ኣሳታ ጊዲያ ጊሾ ቱማራ ኤቄቶሶና። 9 ሺን ያኔሳኔ ያምባሬሳ ኤያቴላይ ቆንጩዳይሳዳ ኤንታ ኤያቴላይካ ኣሳ ኡባ ሲንላን ቆንጫና ጊሾ ኤንታው ሃኒና።

3:8 ኬሳ 7:11

ወርሴላ ዘሬ

10 ሺን ኔኒ ታ ቲሚርቲያ፡ ታ ዲሳ፡ ታ ቆፋ፡ ታ አማኑዋ፡ ታ ዳንዳዓ፡ ታ ሲቁዋ፡ ታ ጌንጫ፡ 11 ታ ዩዴቴላኔ ታ ሜቱዋ ኤራሳ፡ አንጾኪያን፡ አቆኒዮኔን፡ ሊሰደራ ካታማታን ታና ጋኪዳባኔ ታኒ ዳንዳዒዳ ሜቱዋ ኤራሳ፤ ጎዳይ ታና ሄ ኡባፌ አሺሰ።

12 ኪሪሰቶስ ዩሱሳን ያሳ ኡፋይሲያ ዴዎ ዳናው ኮያ ኡባይ ጎዴታና። 13 ኢታ አሳቲኔ ባሌጭሳቲ ባንታው ባሌቲሼኔ ሃራታ ባሌሊሽ ካሴፔ አቲ አቲ ባና።

14 ሺን ኔ ታማሪዳ ቱማኒኔ ኔ አማኒዳ አማኑዋን ኤቃ። ኔ ኦዴሬ ታማሪዳኮ ኤራሳ። 15 ኔኒ ኔ ናዓቴላፌ ደማዳ ኪሪሰቶስ ዩሱሳ አማናዳ አቶቴሊ ዴሚያ ጨንጫቴሊ አማናው ዳንዳዒያ ጌሻ ማፃፋታ ኤራዳሳ። 16 ጌሻ ማፃፋ ኡባይ ያሳፌ አሜቲዳ ቃላ። ሄ ማፃፋይ ቱማ ታማርሳናው፡ ባሊዳይሳታ ሴራናው፡ ሱሪሳናዉኔ ያሎቴላ ዲሳስ ኮሺያ ዘሬ አማናው ማዴስ። 17 ያሳ አሲ ፖሎኔ ሎዎ ኦሶ ኡባ ኦላናው ጊጊዳይሳ ጊዳና ሚላ ማዴስ።

4

1 ታኒ ኔና ያሳ ሲንላኒኔ፡ ካዎ ጊዲዲ ሃራናው ቆንጨያ ዎዴ ፓፃታኔ ሃይቁዳይሳታ ፐርዳናው ዴዒያ ኪሪሰቶስ ዩሱሳ ሲንላን ዘራይስ። 2 ቃላ ኦዳ፤ ዎዴይ አንጃቲን አንጃቶና ኢዲን ሚናዳ ኦዳ። ዳር ዳንዳዒኔ ታማርሶን አሳ ዘራ፡ ሴራኔ ዴንጫ። 3 አሳይ ቱማ ቲሚርቲያ ሲያና ኢዲያ ዎዴይ ያና። ኤንቲ ባንታ አሙዋ ካሊዲ፡ ባንታው ሲዓናው ኡፋይሲያባ ኦዲያ አስታማሪታ ሺሾሶና። 4 ኤንቲ ቱማ ቲሚርቲያ አጊዲ፡ ቱማ ጊዳና ኦዳ ሲዓናው ባንታ ሃይላ ዛርሶና። 5 ሺን ኔኒ ኡባባን ኔና ሃራ። ሜቱዋ ዳንዳዓ። ዎንጌላ ማርካቴላ ኦሱዋ ኦላ። ኔው አሜቲዳ ያሳ ኦሶ ኡባ ፖላ።

6 ታኒ ያርሺቲያ ዎዴይ ጋኪሰ፤ ሃ አላሚያ አጋዳ ቢያ ዎዴይ ማቲስ። 7 ታኒ ሎዎ ኦላ ኦሌታስ፤ ታ ጋዲያ ዎፃዳ ወርሳስ፤ አማኑዋ ናጋስ። 8 ሲንላፌ ያሎቴላ ካላቻይ * ታና ናጌስ። ሄሳ ያሎ ፐርዳ ፐርዲያ ጎዳይ ሄ ጋላስ ታው አማና። ሄሳ ታ ፃላላስ ጊዳናሺን ኢያ ቆንጨኛ አሞቲያ ኡባስ አማና።

ጳውሎሳ ቡዞ ቆፋታ

3:11 ሃ.አ 13:14-52፤ 14:1-20 * 4:8 ያሎቴላ ካላቻይ፡ ያሎቴላ ዴዎ ጊሾ ታ ኤካና ካላቻ። ያሎቴላ ታው ካላቻ ኦሊዲ አሜስ ጉሱ።

9 ኤሌሳ ያዳ ታና ቤዓ። 10 ዳማሲ ሃ አላሚያን ዳዒያባታ ደሲዲ፣ ታና አገዲ፣ ቴሴሎንቄ ካታማ ቢስ። ቁርቁሲ ጋላቲያ ቢታ፣ ቃሲ ቲቶይ ዲልማዒያ ቢታ ቢስ። 11 ሉቃሳ ፃላሊ ታራ ዳዒስ። ማርቆሲ ያሳ ኦሶን ታና ማዳናው ዳንዳዒያ ጊሾ ኔራ ኤካዳ ያ። 12 ታኒ ቲኪቆሳ ኤፌሶና ካታማ ኪታስ። 13 ኔኒ ያሾ፣ ዒሮዳዳ ካታማን ካርፖሳ ማታን አጋዳ ዪዳ ታ ኮቲያኔ ማፃፋታ ታው ኤካዳ ያ። ኡባካ ጋልባን ፃፊቲዳ ማፃፋታ ኤኮና ዮፓ።

14 ቢራታ ቆዒያ ኢስኪንዲሬይ ታና ዳሮ ቆሂስ፤ ጎዳይ ኢያ ኦሱዋዳ ኢያው ዛራና። 15 ኢ ኑ ቲሚርቲያ ዳሮ ኢዒያ ጊሾ ኢያፔ ኔና ናጋ።

16 ኮይሮ ታ ሞቴቲያ ዎዴ ኡባይ አገዲ ቢደሶናፔ አቲን ኦኒካ ታና ማዲቤና። ያሳይ ሄ ባላ ኤንታው ታይቦፖ። 17 ሺን ታኒ ኩሜላ ኪታ አይሁዴ ጊዶና አሳ ኡባስ ማርካቲን፣ ኤንቲ ሰዓና ሜላ ጎዳይ ታ ማታን ኤቁዲ ታው ዎልቃ ኢሚስ። ቃሲ ኮሻቲዳ ጋዎዳ ዶና ዶዪዳ ሃይቁዋፔ ታና አሺስ። 18 ጎዳይ ታና ኢታ ኡባሬ አሺዲ ባ ሳሎ ካዎቴላ ሳሮን ኤፋና። ኢያው ሜሪናፔ ሜሪና ጋካናው ቦንቾይ ጊዶ። አሚንዒ።

ወርሴላ ሳሮላ

19 ጲሪስቁላስ፣ አቁላስኔ አኔሰፎራ ሶ አሳስ ታ ሳሮሉዋ ኦዳ። 20 ኤራስዖሲ ቆሮንቶሳ ካታማን አቲስ። ዒሮፊሞሲ ሃርጌቲዳ ጊሾ ሚሊዴ ካታማን አጋስ። 21 ባልጎይ ጌላናፔ ሲንጤ ኤሌሳዳ ያ።

ኤዉቡሉሲ፣ ጵዳሲ፣ ሊኑሲ፣ ቁላዳይኔ ሃራ አማኒያ አሳቲ ኡባይ ኔና ሳሮ ሳሮ ጎሶና።

22 ጎዳይ ዩሱስ ኪሪስቶሲ ኔ አያናራ ጊዶ። ያሳ ማርቴላይ ሂንቴ ኡባራ ጊዶ።

4:10 ቆላ 4:14፤ ፊልሞ 24፤ 2ቆሮ 8:23፤ ጋላ 2:3፤ ቲቶ 1:4 4:11 ቆላ 4:14፤ ፊልሞ 24፤ ሃ.ኦ 12:12፣ 25፤ 13:13፤ 15:37-39፤ ቆላ 4:10 4:12 ሃ.ኦ 20:4፤ ኤፌ 6:21-22፤ ቆላ 4:7-8 4:14 1ዒሞ 1:20፤ ማገክ 62:12፤ ሮሜ 2:6 4:19 ሃ.ኦ 18:2፤ 2ዒሞ 1:16-17 4:20 ሃ.ኦ 19:22፤ ሮሜ 16:23፤ ሃ.ኦ 20:4፤ 21:29

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source
files dated 29 Jan 2022

c35d6c73-3843-5482-b53e-7559d35deee5